



— Коді — шайтла, коді — яйла...
— Кто — за деньгами, кто — за мясом...
Серпасаліс Аркадый Размыслов.

Асьным асьнымос вочам шудаён!

Видза олан, дона лыддысьысь!

Выль воён тэнё! Выль, а важыс кө лосьыд вёлі, и важ шудён!

Бур асыв-лун-рыт-вой, важ ёртъяс и мян дорё выльён сибод-чысьяс!

Артавын кө, журналлөн тайё выльвося петасыс лоис буретии дасөдён, кызди сійё вуджис мужичойяс «ён кабырысь» нывъяслөн «небыдик кио».

Кодкө, гашкө, и дзик пыр казяліс тайёс, а, кодкө, колөк, мурт-са на та йылысь кылө...

Дерт, выль видзөдласнад, сямнад, гөгөрвоём-гөгөрвотөмнад мыйкө да веж-сис «Мушканзын», но, надейтчам, мый өтистор сылөн колис сэтшөм, кутишөм вёлі нэмсө (журналлы таво тырас оз этша ни уна – 63 ар!); сійё сідзжө кулитө-эрдөдө олөмнымлысь тырмытөмторъяссө да сідзжө серамнас нюжөдө коми мортлысь олөмсө.

Окота висытавын зэв ыджыд аттьө журналнымлөн гижысь-серпасасьысь ёртъяслы, кодъястөг эськө и «ушкөмысь», и «гильөдөмысь» вёлі вывті нин быгалөм, кос да, гашкө, весиг и ковтөм.

Сё пасибө, дона гижысь-письмө ыстысьяс да серпасасьысьяс: Никололай Игнатов (Помөсдин), Александр Уляшев (Скөрөдум), Ольга Баженова (Сыктывкар), Алёна Ельцова (Сыктывкар), Галина Ивкучева (Удора район), Митрофан Курочкин (Сыктывкар), Иван Баженов (Оквад), Цыпанов Йөлгинь (Сыктывкар), Владимир Цивунин (Сыктывкар), Аркадий Размыслов (Сыктывкар), Никололай Парфентьев (Ухта), Мария Размыслова (Сыктывкар).

Надейтчам, воысь-во тиянкөд ёртасьөмным лоас сөмын топьиджык, и воас кад, коркө сольнитчам ставөн өти ыджыд семьяө.

Аттьө тиянлы, кодъяс пырөдчөны мян «Вот тай на!» снимокъяса выль конкурсө. Сэни мян лои нин кык вермысь: Никололай Лютое (Кулөмдин сикт) да Эмилия Пантелеева (Удора район). Выль вермысьяслы лосьөдөма нин гөра козин!

Аттьө и тиянлы, кодъяс эз на гижөд-серпастө миянлы вайлыны, но асланыс чуйдөм-вөзйөм-велөдыштөмөн тишөтиш жө вөчөны журналсө гажайн да коланаён.

Чо и медыджыд аттьө, дерт, тэныд, мян лыддысьысь-листалысь. Плэ ради, и сөмын тэ ради, мян пуркий-пуө юрным, ниртсьө гыррдазыным да гаддялө небыд местаным, кор ми, кызди кужам, лосьөдам-баситам тэныд журналлысь петассө.

Кыв сетам, мый и водзө ньоти элясьтөг (кыз шуласны: шыр кө голя оз вунды) кутам гажөдны тэнё, мян дона лыддысьысь.

Чо и тэ мянөс тишөтиш радейт, мед и водзө вылө лоам нөшта на мичаось, повтөмось да кужысьось!

Шыөдчы мян дорё паныдасигөн, звөнит, гиж! Вай өттишөтиш вөчам асьнымос шудаён!

Пыдди пунктөмөн да радейтөмөн, «Мушканзи» журнал вөчысьяс: Анжелика Елфримова, Екатерина Макарова да Кристина Кривошеева.



Вот тай на!

Дона лыддысысь! Мед тэныд нёшта на гажаджыка овсис, «Чушканзі» журнал да «Мой Дом» отувья вузасянін мөвпыштім «Вот тай на!» выль фотоконкурс.

Медым лоны вермысьён, колё сёмын гижодчыны тайё во джын кежлас «Чушканзі» вылё (пошта ли «Ордым» лавка пыр) да ыстыны мигяны квитанцияыскөд серамбана снимок.

Снимайтны позыё быдтор и быдёнёс, мый син улад усё, сёмын мед кочкавтөдз серавсис!

Вермысьлы кутам быд төлысь во гөгөр вичмөдны, ок, и лөсьыд козин!


И миян сюри коймөд вермысь! Тайё Смоленск обласьса Гагарин карысь Надежда Трубачёва!

Сылы вичмис «MANIA» лавкаысь мича да шоныд куртка!

Колё шуны, мый Надежда абу сёмын ачыс пырөдчөма конкурсё, ышөдөма тшөтш и чойяссё. Артмө, найё вермасисны да вермисны став семья котырнас. Чолөмалам!

И водзё нуодам ордйысьёмнымөс. Локтан төлысьнас вермысьлы бара на вичмас мича курткаыд (снимок вылын)!

Тэрмасьёй! Мичаа пасьтасьнытө окотитысьыд уна, а курткаыд өти! Снимокъяс виччысям урасьём (февраль) 15 лунөдз.



реклама

Өні оз ковмы пөсь кисьтмөн котравны кар пасьтала, корсьысьны мича да модной гач либө юбка, ковта либө пальто: пырав «MANIA» лавкаө, сэтысь сюрас ставыс!

Бур көлуй – бур донысь! Лөсялас и косіниклы, и кызіниклы!

Адрес: Сыктывкар, Сысольское шоссе, 1.

Уджалө асывсянныс рытөдзсыс: 10.00-19.00. Пажынтөг да шойччан лунтөг.

3 места

2 места

1 места



– И сагитіс көзяйка гзоригз...

– И посадила хозяйка цветочек...

(Светлана Матюшева, Воркута)

– Таво ме шыр...

– В этом году я мышка...

(Татьяна Игнатова, Эжва)

– Не кө ме, мыйөн и мичмөдінныг козсө?

– Если не я, чем бы и украсили ёлку?

(Надежда Трубачёва, Смоленск обласьса Гагарин кар)

Миянлы зэв нимкодъ, мый вьль воё «Чушканзілөн» лоисны вьль ёрт-серпасасъысыяс, сідзкё, журналным лоас нёшта на мичаджык да гажаджык!

Төдмасъой накөд!

СССР: Серпа Серал


Константин Чажиров

Чужөма Пятигорскын 1976 вося лөддза-номъя 18 луно. Велөдчөма Пятигорскса государственной лингвистической университетын. Вөлөма велөдысьон, журналистөн, радиоын дикторён, öни зильö заводын.

Томдырсяньыс радейтлөма серпасасъны, торйөн нин карикатураяс. Россияын кыдзи уджъяссö сылысь төдöны Германияын, Италияын, Сербияын, Хорватияын, Македонияын, Турцияын, Румынияын, Польшаын, Словакияын, Люксембургын, Колумбияын да Бельгияын.

Гöтыра, кык челядя.

«Чушканзі» йылысь төдмалөма öтуввез пыр.




Мария Размыслова

Том ныв чужөма Ухта районас Ярега посёлкын. Помалөма СГУ-са иностранной кивъяслысь институт.

Йöзöдöма «Без четверти восход» (2012) да «Флаги под дождём» (2017) кивбур чукöръяс.

Серпасасълөма «Радуга» журналын. Öни ёртасъö «Би кинь» да «Чушканзі» журналъяскөд.



сысь Сьёлöмьд ё-Радлö!

Николай Парфентьев

Кöть и йöзöдчлыс нин «Чушканзын» 2011 восянь, но сэсса бура дыр кeжлö кытчöкö вошлс да, сийöс тшöтш позьö нин шуны выль ёртөн.

Чужöма 1960 воын Микуньын. Ичöт-дырсяныс бать-мамыс босьтöмаöсь ас-кöдныс чужанинас – Удора районö. Сэтөн медводдзайсь и тöдмасьöма «Чушканзи» журналкöд да окота лöма тшöтш серпасавны мыйкö сэтчö.

Армияс ёртгьясыслы серпасавлöма «дембельскöй» альбомгьяс. Сы бöрын велöдчöма Сöветскöй Союза медбур художествоа училищеас – Бобруйск карса ХГПУ-15-ын.

Распределение серти веськалöма Ухтаö, танi и вужгьясьöма: гётрасьöма, быдтöмаöсь кык пиöс. Уджалö карса культура дворечын.



И мянöдз, вöлöм, йöзыс, овлöмаöсь...


(Комиын воддза воясса тöвшөр тöлысьö лöмторгьяс)

1890 во.

Санкт-Петербургса Зимнöй дворечын при-митöмаöсь Печорайсь яран Ефим Манзадейöс.

1925 во.

«Югыд туй» газетын йöзöдöмаöсь удж кузя Коми обласгьяс юкөнлысь во кeжлас шойччан лунгьяс: тöвшөр тöлысь 7 лун (Вежадыр), рака тöлысь 25 лун (Благовещеннö), кос му тöлысь 18 лун (Ыджыд лун водз), ода-кора тöлысь 2 лун (Коми автономнöй обласгья артмöм), сора тöлысь 8 лун (Трöйчалөн мöд луныс), моз тöлысь 15 лун (Успеннö), йирым тöлысь 14 лун (Урожай лун), öшым тöлысь 25 лун (Рöштво).



*Зосима Следниковлөн
медводдза типография.*

1926 во.

«Югыд туй» газетын босьтчöмаöсь йöзöдны лыддысьсысыслысь обласгья шöринсö Усть-Сы-сольскыс Кулöмдiнö вуджöдöм йылысь видзöд-лас-вöзйöмнысö. «Сöмын Кулöмдiн йитас ставнас крайсö öтиö. Сöмын Кулöмдiн öтлалас ас бердас Комилысь став юкөнсö».

1930 во.

ВКП(б)-лөн Севкрайком вöзйöма овмöдны Комиö кулакгьясöс. Татчö шуöма вайöдны 12 сюрс семья.



Мылгiн районса Ичöптгiн посёлок.

1939 во.

Коми АССР-са лунвыв районгьясын муыс вöрзьялöма. Нюдзпоска посёлок дорын сыркмулö-ма 7 баллöдз, Сьöська, Нювчим, Ыб, Межадор, Ви-зин да Кажымын – 5 баллöдз. Нюдзпоскаын пö кис-сялöмаöсь пач трубаяс, а Чукаыбын öдзöсьгьясыс гур-йив воссялöмаöсь, да пачгьясыс потласьялöмаöсь.

Коми кыв ме тӧда!

Журналлӧн воддза вося 9-ӧг номерын ми босьтчим тӧгмӧдны тэнӧ, дона лыдгысьсысь, коми кывлӧн озырлунӧн, сылӧн, ок, уна (быдса гас!) сёрнисикасӧн. Шум, мый окопта кӧ лоас, и водзӧ кутам сетны татшӧмсяма «нӧдкывъяссӧ», кӧні колӧ тӧгмавны, сійӧ ли тайӧ кывйыслысь збыль вежӧртассӧ.

Зэв нимкодъ, мый тэныд съӧлӧм вылаг воӧма «виль ворсӧмьд».

Сизкӧ, бара на юрнытӧ «жуглыштӧй», а ӧти сайын и озырмӧдӧй ассыныд кывворнытӧ.

(Стӧч вочакывъяссӧ видзӧдӧй 14 лист бокась).

- Манилӧ** (луза-летка сёрнисикас)
а) чӧскыдтор
б) приведение
в) прӧст кад коллялӧм
- Магаш** (удора сёрнисикас)
а) зорӧд
б) вина сулея
в) Мария ним
- Маточка** (луза-летка сёрнисикас)
а) лягуша
б) мам
в) муса
- Мизин** (вылыс Сыктыв сёрнисикас)
а) магазин
б) кильчӧ пос
в) семьяын медичӧт кага
- Модитны** (вылыс Сыктыв сёрнисикас)
а) малавны
б) баситны
в) йӧйтӧдлыны
- Мӧмӧлӧ** (емва сёрнисикас)
а) йӧйоват
б) мамлӧн медрейтана кага
в) уджач
- Музӧвтчывны** (удора сёрнисикас)
а) ветлыны музейӧ
б) недыр кежлӧ водлыны
- Мут-мат** (луза-летка сёрнисикас)
а) матькыны
б) кыдзсюрӧ
в) котӧрӧн локны
- Мышкыра** (емва сёрнисикас)
а) нопъя
б) гӧрба
в) йӧра
- Намаки** (луза-летка сёрнисикас)
а) чеччалӧмӧн
б) бӧрӧн
в) садьтӧг (мыйкӧ вӧчны)
- Нежи** (изьва сёрнисикас)
а) сак
б) пӧк
в) тшак
- Неӧпит** (печора сёрнисикас)
а) синтӧм
б) ютӧм
в) идӧртӧм
- Нерука** (улыс эжва сёрнисикас)
а) дӧва
б) ки пӧла
в) абу съӧлӧм серти
- Неструк** (вылыс Сыктыв сёрнисикас)

- а) асмогасянӧн
б) ичӧт зонка
в) абу ки выв

15. **Нӧйкавны** (луза-летка, улыс эжва сёрнисикас)

- а) нӧйтны
б) нӧньӧдчыны
в) нӧужӧдчыны (кӧлуй йылысь)

16. **Ношоланка** (луза-летка сёрнисикас)

- а) тшак
б) кӧдзыд тӧв
в) Ношуль сиктын олысь нывбаба

17. **Нюдзвез** (вылыс сыктыв сёрнисикас)

- а) турунвиж
б) эжӧр
в) ытшкӧм турун

18. **Нялкнитны** (шӧр сыктыв сёрнисикас)

- а) мавтны
б) нявӧстны
в) мыйкӧ ӧдӧй вӧчны

19. **Няргача** (вылыс эжва сёрнисикас)

- а) кыйсян кӧлуй
б) омӧльтчӧм (сӧйтӧмысла)

в) гачтӧм

20. **Оводз** (луза-летка сёрнисикас)

- а) морӧс
б) гырдаза
в) пидзӧс

21. **Ойкӧдны** (емва, улыс эжва, печора сёрнисикас)

- а) ӧна нӧйтны
б) ӧна бӧрдны
в) мунны кыкӧн

22. **Ордӧсала** (удора сёрнисикас)

- а) бокӧн (пуксыны)
б) ордпу туявны
в) ордны

23. **Орд би** (удора сёрнисикас)


- а) ӧчки
б) ӧдва ӧзйысь би
в) пач

24. **Осто** (вылыс сыктыв сёрнисикас)

- а) дӧ
б) зӧ
в) мыйлыкӧ паныда

25. **Очки** (вылыс сыктыв сёрнисикас)

- а) лок татчӧ



Коми диалекты.
Серпасалис Максим Смагин.

- б) орчча
- в) вензъысь морт

26. **Өгар** (улыс эжва сёрнисикас)

- а) палявлыгтём морт
- б) өгыр
- в) гөр

27. **Өзька** (луза-летка сёрнисикас)

- а) зонка
- б) кушман
- в) өдзөс

28. **Өлабей** (удора сёрнисикас)

- а) өладди
- б) йөйө
- в) вывті сюсь

29. **Өшлөпан** (шөр сыктыв сёрнисикас)

- а) ыджыд
- б) статьятём
- в) мисьтём

30. **Паб** (емва, улыс эжва сёрнисикас)

- а) сур лагун
- б) ыджыд гуран
- в) картофель кор

31. **Падей** (шөр сыктыв сёрнисикас)

- а) вильыд

- б) кынём
- в) маска

32. **Паджны** (улыс эжва, сыктывкарберд сёрнисикас)

- а) тырны
- б) ныжмөдны
- в) вуджны

33. **Паёв** (улыс эжва сёрнисикас)

- а) вежөртём
- б) тэрыб
- в) шань

34. **Паймысь** (улыс эжва сёрнисикас)

- а) ньөжмыд
- б) гусясьысь
- в) ылог

35. **Палей** (удора сёрнисикас)

- а) рузум
- б) чотысь
- в) руд юрсиа

36. **Палюн** (сыктывкарберд сёрнисикас)

- а) чышгьян
- б) няргысь
- в) тэрыб

37. **Пань-пань** (улыс эжва сёрнисикас)

- а) кык пань
- б) ичөт морт
- в) горань

38. **Парас** (изьва сёрнисикас)

- а) чукөр
- б) Парасковья
- в) висьөм

39. **Паритны** (удора сёрнисикас)

- а) гөтравны
- б) ылөдлыны
- в) нөйтны

40. **Парма зонгьяс** (вылыс эжва сёрнисикас)

- а) жөникгьяс
- б) ылөдчысьяс
- в) вөрсаяс

Нюмбанён

Сиктным миян шусьö: Сярö.
Уджала ме сэн завгарён.
Гөтыр сетасьö амбарын.
Менö шуоны Закарөн.

Öти воö, сёркодь арын,
Уси нин кор шондї жарыс,
Эштис видз уджалөм-карөм,
Кор нин кынтис, лои чарөм,
Ме да менам гөтыр Марин
Доддялим ми вöv кык пара.
Мөдөдчим сэк Сыктывкарө.
Гөтыр – доддын, бытгө барин,
Менö позьö шуны царөн.

Медводз вөлим ми базарын,
Вузасисны көн сакарөн.
Сэн жö вөзйисны и тарөс
(Пөткөдчö тай кыз пу гарйөн).

Мед эг петкөдчы ме нярөн –
Ветлим чөсмасьыштны барө,
Тяпкөдчыштны «Солнцедарөн»,
Юыштны морт öти чарөн.
Сэни вөли сьод татарин,
Сьылис-ворсис сэтшөм яра!
Морөс вылас жö – гитара.
Медым сиктса көть ме дарөм,
Йөкті тшөтш жö тары-бары.

Матыстчис чиганка Зара,
Сыкөд чойыс, шусис: Сара.
Вөли нөшта коймөд – Варө.
Лөсталөны сьод загарөн!
Гадайтисны сэн кикарөн.
Вай пö вөч миянысь гарем,
Он кө вөч, то лоө кара.
Менö шыбитис сэк парө,
Муртса эз пот юрлөн шарөй.
– Вай жö, гөтыр менам, Марө,
Öдйö вөвгьяс вайөд-варөд,
Веськөд вөвтö дзик мөдарө,
Доддяс пуксям, гөнит-тарөд
Аслам чужан сиктö – Сярö.

Сэсся некор огö-й бара
Мунöй ми некутшөм карө.
Медся лөсьыд аслад парма –
Помас тадзи кывбурала...

*Водзö, көсьянный кө,
бара на лоас...*

*Öлексан Уляшев,
Скөрөдум грезд.*



Чуклөмсаяс ШМС

А тайо серамбана лист боксө мянлы сьолөмсяньыс козь-наліс Сьыктыв районысь Чуклөм сиктса «Олөм-вылөм» газет.

Эскөй көть эн, а сиктса петасыды таво өшым төлысьө пө тырас 10 во нин!

Комын вит тиража газетас редакторалө Елена Обухова, а гижасьоны сэтчө сиктса став олысьыс.

Коді окотитө лыддыны газетгө, но оз вермы судзөдны, позьө вөчны тайос «Вконтакте» «Чуклөм сикт – менам чу-жанін» котырын.

Ыджыд атгө чуклөмсаяслы ыджыд удж вөчөмысь, ась-нысө, а өні артмө, тшөтш и «Чушканзі» лыддысьясөс гажө-дөмысь!

Пэчтуясьөм

Сьолатө өні со ми ружьөн кыйламө, а водзті важ кыйсьысь-ясыд некор абу лыйлөмны, а кый-лөмны петляөн, лэчтуясьөмөн. Дрөб-порокыд оз вөлі шед, дай денгытө жаль видзны.

Лэч туйтө сэки вөдитлөма Митрей дядьыд. Ваддор туй бокті, көнкө, километра кызь кы-мын гөгөртлөма лэч туйыс. Коркө сэсся өтиысь дай мөдысь сьөла пыддыд куш гөныс кый-сигас кутас сюравны, тар-дозмөр

петляысь кутас вошавны и. А лэч туйсө Митрейыд вөлөм пыр өтарсяньыс видлалө. Öтикысь думыштас мөдарсяньыс мунны. Джынсө кымын гөгөртас, сөра дорө матыстчигөн аддзас – ош сулалө, самөй сьолатө нетшкө сө-расьыд. Митрей мышсяньыс гусьөнникөн матыстчас да него-раа шуас ошкыды: «Ак тэ, гу-сясян тай нө!». Ошкыд шытөг и пөрас, сьөлөмыс потас. Друг кө матыстчан, да оз кө аддзы ош-кыд, зэв өна повзьө. А збыль ли абу тайө, код төдас.

Ставыс дась

Менам дядь өна радейтө чери кыйны. Öтчыд чукөртчө сийө ва-дорө. Водз асывсянь кык час чөж чери сөян пуис, анькытша рок, быдпөлөс чери кыян снасть лөсьөдіс, аслыс пажынтор босьтіс, пасьтасис-мольөдчис. И тадзи асывбыд, пажын кад нин кутіс матыстчыны. Со быгтө и ставыс, босьтіс нопсө дядь да петіс. Здук мысти котөрөн бөр пырө: «Ой, вугыр шатөй вунөма!»

Бурджык

Тшупсьысь өти дядьө шулө-ма коркө:

– Йөзыслысь тшупсьөмсө видзөдөм дорысь бурджык сі-тасьөм видзөдны.

– Мыйла нө? – юалөны сы-лысь.

– А синмад чагйыс оз лэбзы!

Радлісны

Вөрын уджалысьяслы шуөмны, мый лавкаө вайөмны «кос» вина. Нывбабаясыд и радлөны: «Кос винатө и видзны лөсьыд, и мужик-сьыд дзебны, пызь моз, мыйта колө, сымда гудралан и».

Кайисны найө лавкаө и корисны «кос» винатө. А вузасьысьыд и шуө: «Винаыд пө абу кос, а сухөй».

Вот и дзебин мужиксьыд!

Повзьөдіс

Менам мамө дыр кад уджа-ліс войся стөрөжөн совхоз гара-жын. Сэки трактор-машинаыд уна вөлі да стөрөжыд быть коліс. Карысь воөм өтруб тыра маши-наястө вой кежлас ректытөгыс и кольісны сөні.

Мастерскөй лөстас бать вөлі вөчөма гуся узьланин, сөні войсө вөлі и коллялө. Вылісяньыд ста-выс тыдаліс: коді мунө-локтө, пырө-петө. Зэв бура стөрөжитліс, сэтшөмөсь тай война кад прөйдитлөм важ йөзыд вөлісны.

А гараж гөгөрсьыс мамө ас-лыс турун пуктывліс. Öти го-жөмө вөлі матайтчөма сельпоса еджыд вөлөн, кодөн кыскаліс-ны пекарняысь магазинас нянь да ва.

Быд рыт пө сийө велаліс га-ражө локны, быглясьө, талялө турунсө. Вөтла пө, но бара на тани. Сэсся думыштас мам пов-зьөдны вөвсө, гашкө пө, өвяс.

Гортсьыс шебрас вылө вай-лөм зэв кузь тулупсө пасьталас гугөн. Вевдор навес бокас сув-тас и кыйөдчө, кор вөлыд лок-тас. Аддзас сылысь матынкөдь, метра комын кымын сайын, зэв мичаа йирсьөмсө, навес сайсьыс кыдзи тай уськөдчас нель ко-касьөмөн!

Вөлыд бок вылас сідзи и брукысяс-усяс. Ачым пө повзи, куліс пө, тыдалө, вөлыд. Абу. Друг звирк чеччас да гөра паны-дыс – скачөн! Сувтлас, шкорк-нитас и водзө скачөн.

Сы бөрын пө сэсся эз нин воы, спокой лои. Ошгьясыд пө сідзи и повзьөдөмөн гырысь скөттө вөлөм джагөдөны.

Оз кыв

Öти олөма мужичөй юасьө:

– Мый нө, өні Лидия Логи-новаыс сьылө оз нин? Мыйкө тай рөд ог кывлы.

– Сьылө, дерт! А кытысь тэ кылан, тэнад радио ни телеви-зор абу. Көсьян, мед горт дорө-дзыд кыліс?!

ОНИТӨНҮ

Жалитіс

Ягын пес кералігас Мишка керыштөма коксө. Ёртыс матыстчас да жалитө сійөс: «Ой-ой-ой, Мишка, кутшөма, көнкө, доймис!». А сапөгыс кералысыддөн дзик выль на вөлөм. Мишка бөрдігтырйи и шуө: «Чөрту эськө кокыд да, выль сапөгыс жаль!»

Эз кыпав

Куим арөса детинка сөйө вөлөм мамөн пөжалөм яблөга пирөг. Пинь улас сюрө пөжасьөм яблөгыс. Детинка вомсө вежынт-лөмөн перйө вомсьыс яблөг тор-сө да шуө:

– Носки кодь!

Татшөм лун

Поштальон ваяс өти олома нывбабалы пенсия. Кабала вылас тшөктас пуктыны кырымпас и талунгя луныслысь числөсө.

Аньыд юалө поштальоныддысь:

– Кутшөм нө талун луныс нин?

– Талун Петыр лун, – шуас поштальонид.

Пенсия босьтысьыд кырымпас дорас сідзи и пасьяс: «Петыр лун»...

Төдмасьө

Кык арөса детинка мамыс-лы водзас пуксис и виддалө кинас сылысь синкымгьяссө:

– Тайө вед тэнад абу ус?..



«Ислалом»

«Слалом»

Серпасалис Аркадий Размыслов.

Тырмымөн

Вөрын өтлаын батьөкөд уджавлісны Изөлөн кык вок. Коркө найө батлы висьтасьөны:

– Недель нин вед кутитам.

– Мый нө юанныд? – юалө батьөй.

– А мамөй воліс да, шкалик водка вайис, сійөс и юам.

Коланатор

Кык арөса пиукөс мамыс босьтө садйысь. Группасысь петігөн кагульничасыс детинкалы сетас лист бок вылын гижөм кывбур.

Мамыс юалө пиыслысь:

– Мый нө сетіс Марина Ивановнаыд?

Детинка кабаласө виддаліг-тыр и шуө:

– Пейсят лублей.

Оз ков?

Кебраын вөлөма тайө тешкодьторйыс. Öти пөчө картофель керигөн пырас гортас, кисө мыськигас аддзө, мый кодкө пырө. Вөлөм картофель ньөбысьяс, сьөд йөз.

– Картошку не продаёте, бабушка? – юаласны сылысь.

Бабыд ва кисө бокас чышкигтыр вочавидзас:

– Картошкүтө нет, не продаю.

Сэссия төд вылас усяс, мый кильчө вылас унакодь перйөм жов пу куст, да вөзьяс воөмаыды, кисө бекьяс чышкигтыр:

– А жоо путө не надө, жоо путө?

– Не, не надо!

Бабыд сэтчө содтас на:

– Если кому-то надо, скажи, я продам!

Тэрмөдпышт

Öтик шоперлысь мырддисны правосө. А гортас колө ас машинаөн ветлыны, и пуксьөдас гө-тырсө руль саяс. Легкөвөй машинаыд муно чожа, туй вылас ыджыд лесовоз вөтөдасны. Нывбабаыд шөйөвошас: «Лөша, мый нө сэссия өні колө водзө вөчны?» А мөдыс и шуыштас: «Тувкы мышсяныыс, мед өдйөджык мунас».

Классика

Аркадий Сергеевич Бухов – гижысь, сатирик, фельетонист.

Чужлөма төвшөр төлысь 26 лунö (важ ногыс – урасьом төлысь 7 лунö) Уфаын көрт туй вылын уджалысьяс семьяын. Велөдчывлөма Казаньса да Санкт-Петербуркса университетгьясын юридическөй факультетын, но некоднансö абу помалөма. 1907 воын кыкысь веськавлөма дзескыдінö быттö РСДРП да эссерьяслөн партияясö пырöмысь.

Литератураö пырөдчөма кывбурьясөн, но нимавны кутöма «Сатирикон» да «Новый Сатирикон» журналгьясын нейдждыс висьт-фельетонгьяснас.

Революция бөрти, 1918 воын, овмөдчөма Литваö да кык во артисталөма сцена вылын.

1920 воын Каунасын босьтчөма лэдзны «Эхо» газет, көні йөзөдчывлөмаось Иван Бунин, Александр Куприн, Саша Чёрный, Аркадий Аверченко, Игорь Северянин, Тэффи, Владимир Немирович-Данченко да мукöд.

1927 воö бөр локтöма СССР-ö. Гижасьöма «Чудак», «Бегемот», «Безбожник» сатира петасьясын, тшөкыда Л.Аркадский да А.Панин ним улын. Сідзжө ёртасьöма «Литературная газета» да «Известия» газеткөд.

1934 восянь зильöма «Крокодил» журналын.

1937 вося йирым төлысь 7 лунö Аркадий Сергеевичос шуöмаось шпионөн да лыйлөмаось.

Бур нимсö бергөдөмаось бөр сөмын 1956 воö.



Видзчысьöй!

Ме эска быдсяма дивöыслы, весиг удждйоз сетöмлы, та вöсна ньöти эг чуймав, кор посводзын неуна кызöктыштис да пырис менам жырйö рöштваса Пöль.

– Тi ме дорö, донаöй?

Пöль шыльöдыштис кузь руд тошсö, öвтыштис еджыд пассьыс лымсö да делöвöя шуис:

– Челядьыд нö эмöсь?

– А тiяны нö статистика могысь?

– Мый?

– Ме шуа, челядьыс мый вылö? Козин вайинныд?

Пöльыд неуна ружтыштис, бара шыльöдыштис тошсö да кызкö мыж гөлөсөн нурбыльтис:

– Козингьяс сертиыд эськö таво сьöкыдкодь. Велавсьöма нин да, сідз ветлөдла. Зонка али нывка?

– Зон.

– Ичöтик?

– Эг эськö шу. Кык төлысь мысти комын квайт тырас. Лоам тöдсаось – прöйдитöй-пуксьöй.

– Кывзöй, – чушмунис Пöль. – Кутшöм нö тi зонка?

– Ме ог дöзмы – верманныд нывкаөн шуны, а козинтö перйöй. Пуксьöй.

Пöль пуксис. Нöшта öтчыдысь кытшовтис сингьяснас жырсö да ышловзис.

– Гöлиника олыштанныд!

– Ошйысьны нинöмөн. Да и тiяны, видзөдөмпөрья, нинöмысь жö нимкодясьныгтö. Нопныд тыртöминик.

– Тыртöминик... Кык запанки да чегöм карандаш... Со и став козиныс.

– А челядьыд, кöнкö, виччысьöны?.. Чувкинысö лөсьöдөмаось, со пö, локтас рöштваса Пöль...

– Челядь... Челядь... А кутшöмось öнiя челядьыд, бурджыка та йылысь мөвпыштлöй...

Пöльыдлөн гөлөсыс весиг тiрзис.

– Со тiянöдз вöли öти керкаын... Пыри узьлан жыргьяс, люкаси камодö да садьмөдi. Зонка юрсö лэптис, лезь юрсиа, видзөдлiс син пöвнас: тэ мыйла татчö? – Кыдзи, шуа, мыйла – а козингьястö нö? – Ылөдлан, шуö, кöнкö, чувкитö сöпнитны кöсьян. Аслам сöмын гоз коли, мун, мун! – Кутi ме сийöс эскöдны: яндзимыд абу, кагалөн... Муртса шуи тайöс – сідзи и прысьмунис мустöмыд, Вöли пö кагаөн, а öнi пö кадыс абу сэтшöм, мед кагаөн век на кольны... И мыйсяма пö пöрысь кутш пондас войяснас тöдтöмгьяс дорö ветлысьны, мед сьöмтөг козингьяс разöдны? Мун, шуö, дед, мун, эн йöйтав, сет узыны...

Поль мыйкө ас кежсыс казтыштис да пыди
ышловзёмөн вочавидзис:

– Съёлышти сылы чувкиас да муні.

Сійө чөв олыштөм бөрүн выльысь заводитис.

– Либө со нөшта өти керкаө пыри... Видзөда,
абу чувки лөсьөдөмаось, а быдса сапөг. Корсышти
синмөн, абу-ө мөд пөлыс көнкө матын. Эм. Лөсьыд,
висьтала тиянлы, сапөг – сөмын на лавкаысь.
Муртса видзөдлі на вылө – кадыс, шуа, төв нин,
мортыс ме өтка... Пукті на вылө картонысь вөчөм
понйөс да муні. Муні ме, сулалышти кильчө вы-
лас... Сулалышти кильчө вылас...

– Но?

– Сэсся бөр косі да и босьті.

– Понсө?

– Эг. Сапөгсө. Лишалана кө вөлі, эськө эз пук-
тыны.

Поль мыжа лапнитис синъяснас да гусьөн
видзөдліс ме вылө.

– Да, пиук, өні абу важся кодь олөмыд... Либө
нөшта өти вөвлөмтор... Локті ме өти керкаө да
аддза, посводзас ва коч ку шапка өшалө, а некод
некөн абу... Төв нин, а шапкаыс лөсьыд, а дзик-
дзик некод абу... Вай, шуа, шапкасө сюя ноппө, а
сэсся тотшкөдча... Тотшкөдчи, пыра, юала: че-
лядьыд эмөсь? А меным воча...

Пөлыд другысь ланьтис, повзёмөн видзөдліс
ме вылө да поңдис кинас өвтчыны:

– Сөра ме, эз вөв татшөмыс, пиук, збыльысь
шуа, эз вөв...

– Кывзы тэ, пөрысь выжыв, – зумыша шыаси
ме, – шапкаыс ва коч куысь?

– Сыысь, пиук, – нурбыльтис вомгорулас
Пөлыд.

– Пытшкөссө съөд матерьеөн эжө...



– Здравствуйте! Я – инфляция...
Серпасалис Вячеслав Шиллов.



Колльөдчөм...

Прощание...

Серпасалис Александр Сергеев.

– Съөдөн, пиук, съөдөн.

– Кыскы, но-ко, нописьыд. Öшөд места вылас.
Дзик пыр! Кыла, мися, кодкө посводзас нохсьө...
Восьты вай ноптө... Но тэ и гусь-вөр, Поль –
шарпсө тшөтш кватитөма да ланьтөмөн олө... Сэсся
нинөм эн сөпнит?

– Грекө вөйи... Төв өд, а мортыс ме өтка.

– Нинөм, нинөм... Меным ывла вылас абу жө
жар... Вош татысь, Пөль...

– Аттьө, пиук, пукалышти и тырмас... Муна
нин, ог дөзмөдчы... Сідзкө, шуан, челядьыд абу?

– А мый нө, рузумсө көсьян гусявны?

Поль ружтыштөмөн муніс. Ме кольөді сійөс
өдзөс дорөдзыс, бөр пыри да көсийи пепельничай
чигарка помөс вомысь шыбитны. Съөкыд эзысь
пепельничай вөшөма.

Челядь, эн эскөй рөштвоса Пөлыдды. Эмнас
найө, дерт, эмөсь, но сэтшөм гусясысьсөсь, мый
бурджык не төдмасьны накөд. А збыльысь кө око-
титөны козинтө вайны, мед локтөны луннас, а
нөшта бурджык, пошта пыр кө ыстасны. Пошта-
саясыд прамөй йөз, найөс позьө весиг рытнас гор-
тад лэдзны.

(Клубса сцена вылын висъталан тешторъяс)

Ас могъяс

Бур рыт, дона ёртъяс! Аттьö, мый локтінныд миян клубö, ой, культу-ра керкаö. Аттьö и меным, мый ме локтї...

Ме эськö быд залö воывла да, кытчö йöзыс чукöртчылöны.

Вот тї воанныд культура керкаад да залас пыртöдз медводз кытчö кежаланныд? Кодкö со пöрччысянінö. Морж, кöнкö... Ог тöд, кыз тї, а ме, прöща кора, медводз котöрта асмогасянінö. Менам öти тöдса эм, сійö концерт вылад мунтöдз некор гортас оз личöдчы. Мыйла пö кута гортысь бисö да васö видзны, кор пö концерт вылö муна. Сыысь пö öд мынтысьöма, шуö, сідзкö, ставысь пырö билет донас. И асмогасянінад ветлöмыд тшöтш.

Ме уна залын нин выступайтлї да, быдсямасö тöдлї. Öти карын, помнита, концертаси. Зэв бур кар, зэв бур йöз. Тян кодьöсь жö шаньöсь, вежавидзысьöсь...

Вölї сэнї и гримёрка, и асмогасянін сэн жö, гримёркаас. Шензян дай сöмын! Помнита, ваыс сэн эз вöв. Некön ни öти войт. Ни мысян дозъяс, ни бачокас. Гөгöрвоанныд? Со и пуктöмаöсь меным вölї ведра да кöш. Мед кö öнї кызь öтикöд нэм! Сё збыль! А кöшыс муртса кабыр ыджда. Та вöсна зэв тэрыба колїс ставсö вöчны, мед ладмöдчыны. О, Господи да Енмöй! Тöданныд, мый йылысь ме мөвпалї ачымöс могмöдїгөн? Найö со 50 миллиард доллар видзисны Олимпиада вылö, а ме лэдзöмаöс кылöдны ог вермы. Сідзи и артмö да!

Менам чайтöм серти, медводз асмогасянінъясөн мыйкö колö вöчны. Меным шуöны, кызди пö тэ татшöмтор йывсьыс верман сцена вывсянь висътавны? Кызди-кызди?! Сідзи! Öд буретш асмогасянін серти позьö

нин гөгöрвоны, кутшöм миян странаын культураным. Кольöм во со культураыдды быдса во сиисны, и мыйкö вежсис?! Но, гашкö, кöнкö и вежсис. Шуам, сійö жö дворечас ыджыдджык кöш ньöбисны...

Вот висъталöй меным, мыйла оз позь олöмсö бурмöдны асмогасянінъяссянь? Сы ыджда стадионъяс быдлаын зымгам-лэптам, а төрöпитас кö, и саймовтчывнытö некытчö. Дерт, стадионыд космоссянь весиг тыдалö, а асмогасянінтö сöмын ачид тöдан, кытчö сійöс тэнсьыд дзебöма. А мукöдыслы – военная тайна!..

Миян странаын олö 150 миллион морт. Да! А мый тї чуймаланныд? Тї он на тöдöй, мыйта Китайын олысьыс?.. И со тайö 150 миллионсьыс матö пö 3 миллион сайö мортыс талун век на котралö ывласа чомйö!

И клубъясад, ой, культура керкаясад, дзык жö сідз...

Ме ёна гастрольнад республика пасътала ветлöдла да, пöшти öд быдлаын тэнö «М» да «Ж» шыпасъяс вежыня пу чомъясыд Ленинön на пуктылöм часöвöйяс моз паныдалöны. Абутöм нин юрсиыд помывив сувтлö наысь мукöддырйиыс! Найöс öд позьö «Кристи» ли «Сотбис» нималана аукционъяс вылын вузавны «Кызди важ йöз какасьлісны» ним улын, гөгöрвоанныд? Кинас и кокнас нетшыштасны! Да нöшта на кутасны корны!

Муна ме, шуам, кытчöкö районö. Дыр нин муна, а туй бокас петавнытö он лысьт. Сэтчö тэöдз, СССР-ын на олысьясыд, куим пöвста «минаяссö» кодзöмаöсь. Муыс, кöнкö, та понда сэнї оз нин и сывлы да. Кызд шуласны, вечная мерзлота! Кежалан кö, газет торъяссьыс верман тöдмавны страналысь став историясö, некутшöм библиотекаысь книга оз ков босътны...



– Кодлön тайö добраыс?!

– Чей это «сюрприз»?!

Серпасалїс Вячеслав Шилöv.

Клубад воан да, медводз быць тьоскысь лэптём чомъяд котөрөн кежалан. Татог некыз оз позь. Некутшом памперс оз терпит... Индыны тай, майбыр, сийос оз ков, куньса синмон вой шөр во-йын аддзан, быттьо мыйонкко кыско ас дорас. Но, асьныд тодан-ныд, мыйон... Пыран сэтчө...

Казьтышта налы, кодлөн, гашкө, шоныдинад пукалігад вуніс нин да... Вот, пыран сэтчө и полан нин весиг сынодас ляк-сыны. Пешкыльтчан розь весь-тас, быттьо рака аслас поз до-рышас. Коктө на од колө мый вынсьыд паськодны, мед веська-лан. Стенас мыджсьынытө он лысьт, мыйла кодсюрө сэтчө уди-томаось нин пасьясьнытө.

А кодсюрө нөшта шензьө на, кызди пө миян даддьон ислась-ысь бобслеистьяс сэтшөма кужө-ны йөткыштчыны. Кыдзи-кы-дзи?! Миян од тадзинад став ки-кок яйыд ёнмө, йөралөн кодь лоө! Асьныд мөвпыштлөй: мед-водз ясли, сэсся детсад, сэсся школа, сэсся градйөр – олөмыд татшөм пешкыльтчөмнас и мунө.

Но тайотө мый на! Та кын-дзи од колө на нөшта и одзөссө кутны кызкө. Эм кө, дерт, та-тшөмыс. Игансө од сэтысь код тодас кор нин яйнас нетшыштө-маось. И сийө пыр видзөдчө тэнө йөз водзас мыгчөдны, быттьо ошйысь: видзөддөй пө, коді ме-нам сэн! А одзөсныс налөн мый-лакө пыр мир туйланьыс.

Нывбабаяслы нөшта на де-лөджык – найө асьыныс сум-касө пиньнас кутөны. Но и тайө абу на ставыс. Пукалан тэ коктө паськодөмон пешкыльтчөм. Сум-катө пиньнад шашаритөмыд. Да од колө на... тьос костөдыс кы-йөдчыны, оз-ө лок тэлань кодкө. Мед удитны горөдны: «Тані эмось нин!». Он кө удит горөд-нытө, ортсысяныс тэнө сы вы-йөдз тракнитасны, рака мозыд и лэбыштан аслад позсьыд, сөмын кабалаыд тэныд бөрсяныд пон-дас өвтчыны!

Ылын на миянлы, ёртъяс, культурной олөмөдзыд, ок, ылын, көть ті сэсся мый шуөй... Ыджыд-торйыд од ичөтсьянь заводитчө, көть тэ кутшөм бурторйө босьт-чы...

Томмөдчөм

С аридз горын дөра креслөын пукалө да гожйөдчө ань. Ты-галө, мый озыр – быд чуньын чунькытш. Триньөбтө теле-фон.

– Да, кывза. Коді тайө? Анна? Кутшөм Анна?! Кутшөм чумра-ботница?! Ті көръяслы али мый звөнитанныд?! А, домработница менам, Анна! Гөлөстө та ылнасяныд эг төд! Но мыйкө лоис али мый? Балиөдз звөнитан. Кутшөм бальө? Тэнад бабыддөн, гидас, колөкө, и тырыс бальө! А ме со Балиын шойчча!

Но, висьтав нин, мый көсйин, дзыкөдз пөсьө койыштис! Мый шуан: Ванюшалөн пельыс виялө? А мыйысь виялө? Кутшөм лым? Ни өти лым чир некөн абу да! А... тьян сэні тырыс лым. И мый лымйыс Ванюшалөн пеляс вөчө? Коді сюяліс? Ачыс сюяліс, мед Катюшалысь няргөмсө эз кыв?! Вот кутшөм сюсь менам пиукөй! А Катюшаыс нө мыйысь сэтшөм гораасө няргис? Ванюшаыс сылысь аканьсө лым пиас гуалис? Шуис, мый кодзыдас сийө дырджык оз пөрысьмы? Ой, кутшөм сюсь менам пиукыс да! А пельыс нө мыйла, сідзкө, виялө, лымйыс өд, кызд ме помнита, чорыд комөкөсь? А... гортад пыринныд да сыліс? И Ванюша корө, мед мамыс видзөддас, кызди сылөн пельөдыс юр вемыс визувтө? Ой-ой, мый нө менам кагукыскөд лоас, став вемыс кө пельөдыс тэпка-а-а-ас! Но-ко, котөрөн кутшөмкө доз пель дорас пукты, мед сэтчө войталас! Сэсся өдйө пипеткаон нырөдыс бөр сюй! И видзөд, мед ни өти войт бокө оз веськав! **(Пуктө трубкасө да чеччө).**

Ууупш! Коркө, буракө, дзыкөдз йөймөдас менө тайө Аннаыс! Надейтча, мый Ванюшалөн став вемыс бөр места вылас веськалас! **(Видлө асьыс пельсө).** Менам, слабөг, пельөй со кос, а од вермас, көнкө, шондө улад тшөтш сывны да тэпкыны! Ковмас пельө вата суйны, мед костті татшөм неминучаыс оз босьт! **(Мыйкө пеляс быттьө сюялө).**

Триньөбтө телефон, ань оз кыв. Көсйө пуксьыны, но улөс вылас телефоныс «легө» да повзьөдө. Босьтө трубкасө.

Алө! Алө! Нинөм оз кыв! Тайө коді! Мый нинөм он шуөй! **(Бөр пуктө трубкасө).** Мый морысла либө звөнитчан, он кө шыась! **(Бара триньөбтө телефон, босьтө трубкасө).** Алө! Коді сэн дурө?! Төдмала кө, юрситө эськө өтитөг нетшка! **(Коймөдысь триньөбтө телефон, телефоныслы грөзитчө).** Но өні кө он шыась, ме тэныд сэні петкөд-ла пуж! **(Босьтө трубкасө).** Тэ чайтан меным тан сэсся нинөм вөчнысө, кызди лунтыръясөн телефон дорын тутвидзны да тэнад йөй звөнок вылө вочавидзны?! Алө! Анна! Анна тэ?! Мый нө нинөм оз кыв, тэ эськө кытчө трубкатө сэн суйин да звөнитчан, мый өдва кылө?! Мый шуан? Дзык пель дорад кутан? А мыйла нө ме эськө нинөм ог кыв, быттьө вата шебрас пытшсянь броткан! О, енмөй-енмөй! Вуні, мый аслам пель тырыс вата да сэсся, дерт, ог кыв! **(Быттьө перьялө мыйкө пельсыс).** Анна, тэ?! Мый нө бара нин сэн тьян лоис, оз позь өти звук кежлө тэныд челядьос кольны? Мый шуан, кык төлысь нин гуляйта. Кадыс лэбө да! Быттьө төрыт на локті-а... Но висьтав сэн өдйөджык, а то менам тайө телефон кутөм-сьыс пельөй оз гожъяв. Сідзи и ковмас мунны татысь пөла-пөла пельөн. Мый вөчисны челядыс? Став аканьсө лым толаас гуалис-ны? Кодөс сэсся көсйөны? Бобикөс? А Бобикөс нө мыйла, сийө сідз нин, коньбрушкай, пөрысь да. Мед пө выльысь томмас? Збыльысь али мый позьө кодзыдас томмыны?! Мый ме, сідзкө, йөйыд тані, жаринас, вөча? Колө котөрөн гортө мунны, кытчөдз төлыс эз по-мась, да лым пиас сунлыны! Анна, аски жө лэба гортө! Аканьястө бөр перьялөй, ме ачым кута лымнас томмөдчыны! **(Шыбитө теле-фонсө да котөртө).**

Кодлыкө «доступной», а инвалиды – абу

Миян республикаын оло 840.873 морт, на пиысь 61.457-ыс инвалид и на лыдын 3.344-ыс – челядь.

ВОИ-өн (Вермытөмгяслөн ставроссияса котырөн) юрнуодысь Маргарита Колпащикова серти, найö быд во нуодоны сідз шусяна мониторинг, видзөдöны, көни мый вöчöма. Неважөн со юасьöмаось дас вит муниципалитетысь вермытөмгяслысь да, тыдовтчöма, мый налөн олöмыс некөн абу кокныдджык. Найö оз вермыны веськавны ни бурдöдчанинö, ни аптекаö, ни лавкаö, ни театрö – немытчö! Кодсюрö весиг гортсыс оз петавны, керка кильчöсö абу колана ног лöсьдöмаось да.

Республикаын со 20 кинотеатр, но вермытөмгяс немытчö оз сибавны. Сыктывкарын татшöмыс 5, Ухтаын – 3. Сідзжö эмöсь кинотеатръяс Интаын, Усинскын, Печораын, Воркутаын, Изьваын, Емваын, Зöвсьöртын, Вуктылын, Куломдинын, Ярегаын, Абъячойын, Визинын. Но... Гашкö, учреждениеясөн веськöдлысьясыс чайтöны, мый инвалидыясы абу интереснойöсь вель кинофильмъясыс да налы нинöмла ветлыны кинотеатрö.

Век жö вермытөмгяслы сюрöма öти кинотеатр. Маргарита Колпащикова лөн кывъяс серти, сійö Ухтаса «Ярмарка» вузасян шöринын.

Кедзөвтöны инвалидыясöс и шоперъяс. Быд вузасянин, больнича дорын торйöдöма вермытөмгяслы парковка. Но олöдан пас вылö видзöдтöг сэтчö ассыныс «корт вöвсö» сувтöдöны мукöд шоперыс. Вермытöмлөн жö машинаыс бокын.

Шыдчылöны ГИБДД-ö, мөдым кыскасны кывкутöмö асныра шоперъяссö. Но погона йöзсянь тшöкыда воö вочакыв,

мый шоперсö абу аддзöмаось. Кор пö волім, машина руль саяс көзяиныс эз вöв.

Шогмытöмөсь пандусъясыс абу сöмын уна патераа керкаясын, но и больнича-аптекаын (а сэтчö висысь мортлы быть лöв ветлыны), и вузасянингясын, и администрацияын, и ведомственной учреждениеясын.

– Аптекаыс шусьö «Будь здоров», а кызди сэтчö пыран лекарство-уколысла? Локтан мукöд вузасян шöринас, а сойдöдыс кайны он вермы, зэв крут пандус вöчöмаось да, кыт и дзоньвидза мортыс оз кай. Ме öни тöд вылын кута тшöтш и коляскаа мамъясöс. Татшöм пандусъяссö «Америкаса гөркаөн» шуам, – шогпырысь шмонитыштис Маргарита Михайловна.

Рейдö петалигөн казялöмаось и, мый звөнитчан кнопкаяс либö оз уджавны, либö триньгы коть эн, некод оз пет. Общественникъяс юасьöмаось, мыйла, сідзкö, колöны найö. Öтилаын вочавидзöмаось, мый уджалö, сöмын пö кусöддöны шысö. Мöдлаын вочавидзöмаось, мый урчитöм пöрадок серти уджаланисö кольны оз позы. И тадзи весиг республикаса соцзащитаын.

Республикаын кыпöдöны вель спорт объектъяс, но вермытөмгяслы сэтчö абу жö кивыв ветлыны. Шуам, туялöмаось Сосногорскысь вель спорткомплекс. Öтикö, порогъясыс джуджыдöсь. Мöдкö, медым пырны бассейнö, колö пöрччысянинсяныс пасьтöгыд петны коридорас, кытшовтны кузьялыс да мөдарсяныс вöлисти пырны варччанинас. Сэсся уялөм бöрад бара жö пасьтöгыд, люстик ва кытшовтны паськөмыдла.

Стройба кыпöдтöдз ставныс дасьтöны проект. Сэтчö урчитöма нин пандус, перилö, кнопка,



подъёмник колана ног вöчöм. Но мыйлакö стрöйтчигас нин «кежöны» проектсыс. А медся шензöданаыс, мый надзор служба-са примитöны стрöйбасö, бытьтö сэнн ставыс лючки.

Сэсся йöзыс кутасны элясьны да, заводитöны туявны тырмытöмторъяссö, мыйла тадзи лöмла. «Фронтöвикъяс», ВОИ-са тырöмаось нин татшöм элясяна шыдчöмнас.

ВОИ-ö пырысьяс асьныс дасьсöс отсавны надзор службаылы, чинаяслы, кодъяс кывкутöны сідз шусяна доступносът вöснаыс. Тайö колö оз сöмын миялы, но и кагаа бать-мамлы, олöма йöзлы. Ставөн öд коркö пöрысьмам, да и крепид дзоньвидзалунөн некод оз вермы ошйысьны.

Оланпасыс эм (ФЗ 181 ст. 15 «О социальной защите инвалидов»), а оз уджав. 2015 восянь ВОИ пыр шуöма сёрнитчыны, кутшöмөн лöв вель стрöйбаыс да матигöгöрыс, мед сэтчö вермис веськавны инвалид. Но олöмыс, тыдалö, абу оланпас серти...

Екатерина МАКАРОВА.
Снимокыс ВОИ-лөн «ВКонтактеын» «РК вне зоны гоступа» лист бокысь.



Стöч вочакывъяс (7 п.ö.)

1. б; 2. в; 3. а; 4. в; 5. б; 6. а; 7. б; 8. б; 9. б; 10. в; 11. а; 12. в; 13. в; 14. в; 15. в; 16. в; 17. а; 18. в; 19. б; 20. в; 21. а; 22. а; 23. б; 24. в; 25. в; 26. а; 27. в; 28. а; 29. б; 30. в; 31. в; 32. б; 33. а; 34. в; 35. а; 36. б; 37. в; 38. а; 39. а; 40. в.



Владимир Александрович Попов,
коми кывбуралысь.
Чужис 1934 вося төвшөр 1 лунö Изъваын.



Пышкай

Төвся шонді оз на-й пет –
Кодзыдысла дыш тай.
Дзольгö, узыны мен оз сет
Руд дөрöма пышкай.

Кодыр сылы кык содз тыр
Петкöда нянь крöшки,
Сійö нимкодясяс дыр,
Инас сэк оз öшйы!

– Кокав, дзоля, – шуа ме, –
Некор мед он кынмы.
Чеплялö öд, кöнкö, зэв
Коктö еджыд лымйыс.

Тэ öд, мукöд лэбач моз,
Эн и лэб лунвылö,
И со мен быд асывводз
Тулыс йылысь сбылан.

Менö муса мамöй...

Асъя шонді малалö
Менсьым чужöмбанöс,
Узянінсьым чеччöдö
Менö муса мамö.

Төвру бриньгö öшиньö,
Оз жö ов сэк рама,
Школаö кор мөдöдö
Менö дона мамö.

Рытнас, кызди-й классаным,
Зильлунöй мөй ямö,
Ошкас коть пятёркаысь
Менö зарни мамö.

Водзын луныс лыдтöм на...
Пыр мед содті сямöс,
Шаня овны велöдö
Менö стрөг, бур мамö.

Серафим Алексеевич Попов,

Коми АССР-са народнöй поэт.
Чужис 1913 вося төвшөр 8 лунö
Емдін районса
Зöвсьöрт сиктын.



Вок

Пызан увті подөн
Мунö менам вок,
Медводдзаясь кодöс
Нуö аслас кок.

Сералöны, кыла:
– Медся ыджыд морт!
Сетöй öнi сылы
Паськöдны том борд...

Мамлы медводз инмö:
– Мыйöн лоан, пи?
Воклөн чöдлач синмас
Дзирдалö кык би.

Шуи мамлы төрыт:
– Эновт ассыд шог,
Выль керкаад төрас
Ещö сизим вок!

Горш пи

Аддзис зонлөн завидь син
Пызан вылысь апельсин.
– Вай мен кыкöс, – горзö, – мамö,
Кыкöс öтпырйö ме няма!
Мам эз жалит – сетис кыксö,
Мед оз лэпты пиыс зыксö.
– Колö куим... колö нель...
Сёя, – некодлы ог коль!
Муса пиыс дзикöдз ышмис,
Мамсö лыйлö йирöм кышнас:
– Меным пызан вылö вай
Тшöтш и ичöt чойлысь пай!
– Яндысь! – шуö сылы мамыс, –
Кöнi тэнад, пийöй, сямыд;
Сöмын öтнас бегемот
Поттöдз сёяс, да оз пот.
Но эз кывзысь пиыс...
Вот и
Кутшöм овлö завидь син!
Ышмöм зонмыс збылысь потис,
Сёйис кор
Дас апельсин.

Эськӧ тӧлыс кӧ эз вӧв

(«Кабы не было зимы» сьыланкыв
«Каникулы в Простоквашино» мультфильмысь)

Эськӧ тӧлыс кӧ эз вӧв
Сиктьясын ни карын,
Ас бӧрсяыс турун шӧвк
Эськӧ вайис арыс.
Ӧти лым чир тор эз усь,
Лямпаыд эз ковмы.
Луныс вӧлі эськӧ кузь,
Эз и ковмыв водны.
Луныс вӧлі эськӧ кузь,
Эз и ковмыв водны.

Эськӧ тӧлыс кӧ эз вӧв,
А пыр гожӧм пӧжис,
Сэки дадаяд эн и сӧв,
Помся подӧн жӧдзин.
Эськӧ турӧбыс эз гарт,
Пашлякыд эз лыйсьы,
Гӧгӧр ставыс вӧлі няйт,
Йи улад эн кыйсьы.
Гӧгӧр ставыс вӧлі няйт,
Йи улад эн кыйсьы.

Эськӧ тӧлыс кӧ эз вӧв,
Кӧдзыд пӧль эз воны,
Выль во дырйи точким чӧв,
Козинъястӧг олім.
Вӧрысь эгӧ вайӧ коз,
Сы гӧгӧр эг пессьӧй.
Гын сапӧгӧс сӧйис воз,
Эськӧ, эськӧ, эськӧ.

Комиӧгіс Лика Фимова.



«Чушканзі»

(«Оса»)
журнал (6+).

Главной редактор —
А.Г.Елфимова.

Редактор —
Е.В.Макарова.
Редакциялӧн адрес:
167982, Коми Республика,
Сыктывкар,
Карл Маркс ул., 229.
Телефон:
(8212) 24-36-00.
E-mail:
komimucos@hotmail.ru

Журнал паньсы:
Коми Республикаса
юралысьлӧн
администрация.
Адрес:
167000, Коми Республика,
Сыктывкар,
Коммунистической ул., 9.

Журнал лӧдзсы:
«Коми йӧздӧчан керка»
Коми Республикаса
автономной учреждение.

Веськӧдлысь —
И.Н.Орӧл.
Адрес:
167982, Коми Республика,
Сыктывкар,
Карл Маркс ул., 229.

Журнал петӧ
коми кыв вылын,
тӧлысьнас ӧтчӧд,
1957 восянь.

Регистрируйтӧма
2017 вося март 30 лунӧ
Роскомнадзорлӧн Коми Рес-
публикаын веськӧдланӧнын.
ПИ №ТУ11 — 00350
Гижӧдчан индекс: П4366
Доныс сӧрнитчӧмӧн.

Социальной тӧдчанлуна ги-
жӧдъясьӧ йӧздӧдма «Коми
йӧздӧчан керка» автономной
учреждениель Коми Рес-
публикаса юралысьлӧн админи-
страцияӧн вичмӧдӧм сьӧм
вылӧ.

Авторьяслӧн мӧвгыяс оз пыр
лӧсявны редакциялӧн ви-
дӧдмӧсӧн. Журналӧ гижигӧн
быть колӧ пасыны ов, ним,
вич, чужан кад, паспортлысь
серия, номер, кор да кӧні
сетӧма, а сӧдӧжӧ пенсионной
страховӧй свидетельствоясь
да вот мынтысьлысь номер
(ИНН).

Январь (тӧвшӧр),
1 (749 №).
Кырымалӧма печатӧ
2020 вося январь 27 лунӧ.
Петас
2020 вося январь 31 лунӧ.
Бумагалӧн форматис 60x84
1/8. 2 печ. лист.
Тиражыс 401 экз.,
Заказ № 20-487
Лӧдзӧма офсет печатӧн
дась оригинал-макетясь
«Коми республикаса ти-
пография» ООО-ын.

Типографиялӧн адрес:
167610, Коми Республика,
Сыктывкар, В.Савин ул., 81.

Кӧдзыд пӧль да Кӧ.
Дед Мороз и Кӧ.
Серпасалис Максим Смагин.